

遼

史

六

欽定四庫全書

志第七

遼史三十七

開府儀同三司柱國錄國事

中書右丞相修國史領經筵事都總裁臣脫脫

奉

勅修

地理志一

帝堯畫天下爲九州舜以冀青地大分幽并營爲州十有
二幽州在渤海之間并州北有代朔營州東暨遼海其地
負山帶海其民執干戈奮武衛風氣剛勁自古爲用武之
地太祖以迭剌部之衆代遥輦氏起臨潢建皇都東併渤
海得城邑之居百有三太宗立晉有幽涿檀劍順營平蔚
朔雲應新媯儒武襄十六州於是割古幽并營之境而跨

有之東朝高麗西臣夏國南子石晉而兄弟趙宋吳越南
唐航海輸貢嘻其盛矣遼國其先曰契丹本鮮卑之地居
遼澤中去榆關一千一百三十里去幽州又七百一十四
里南控黃龍北帶潢水冷陁屏右遼河塹左高原多榆柳
下隰饒蒲葦當元魏時有地數百里至唐大賀氏蠶食扶
餘室韋奚靺鞨之區地方二千餘里貞觀三年以其地置
玄州尋置松漠都督府建八部爲州各置刺史達稽部曰
峭落州紇便部曰彈汗州獨活部曰無逢州芬阿部曰羽
陵州突便部曰日連州苦奚部曰徒河州墜斤部曰萬丹
州伏部曰匹黎赤山二州以大賀氏窟哥爲使持節十州

軍事分州建官蓋昉於此迨于五代闢地東西三千里遙輦氏更八部曰旦利皆部乙室活部實活部納尾部頻沒部內會雞部集解部奚嗚部屬縣四十有一每部設刺史縣置令太宗以皇都爲上京升幽州爲南京改南京爲東京聖宗城中京興宗升雲州爲西京於是五京備焉又以征伐俘戶建州襟要之地多因舊居名之加以私奴置投下州總京五府六州軍城百五十有六縣二百有九部族五十有二屬國六十東至于海西至金山暨于流沙北至臚胸河南至白溝幅負萬里

上京道

上京臨潢府本漢遼東郡西安平之地新莽曰北安平太祖取天梯別魯等三山之勢于葦甸射金甌箭以識之謂之龍眉官神冊三年城之名曰皇都天顯十三年更名上京府曰臨潢來流河自西北南流遶京三面東入于曲江其北東流爲按出河又有御河沙河黑河潢河鴨子河他魯河狼河蒼耳河輞子河臚胸河陰涼河豬河鴛鴦湖興國惠民湖廣濟湖鹽礫百狗礫大神淀馬孟山兔兒山野鵲山鹽山鑿山松山平地松林大斧山列山屈劣山勒得山唐所封大賀氏勒得王有墓存焉戶三萬六千五百轄軍府州城二十五統縣十

臨潢縣太祖天贊初南攻燕薊以所俘人戶散居潢水之北縣臨潢水故以名地宜種植戶三千五百

長泰縣本渤海國長平縣民太祖伐大諲譭先得是邑遷其人於京西北與漢民雜居戶四千

定霸縣本扶餘府強師縣民太祖下扶餘遷其人於京西與漢人雜處分地耕種統和八年以諸宮提轄司人戶置隸長寧宮戶二千

保和縣本渤海國富利縣民太祖破龍州盡徙富利縣人散居京南統和八年以諸宮提轄司人戶置隸彰德宮戶四千

遼縣本幽州遼縣民天贊元年太祖破薊州掠遼縣民
布於京東與渤海人雜處隸崇德宮戶三千

易俗縣本遼東渤海之民太平九年大延琳結構遼東
夷叛圍守經年乃降盡遷於京北置縣居之是年又徙
渤海叛人家屬置焉戶一千

遷遼縣本遼東諸縣渤海人大延琳叛擇其謀勇者置
之左右後以城降戮之徙其家屬於京東北故名戶千
渤海縣本東京人因叛徙置

興仁縣開泰二年置

宣化縣本遼東神化縣民太祖破鴨綠府盡徙其民居

京之南統和八年以諸宮提轄司人戶置隸彰愍宮戶
四千

上京太祖創業之地負山抱海天險足以爲固地沃宜耕
植水草便畜牧金齒一箭二百年之基壯矣天顯元年平
渤海歸乃展郭郭建宮室名以天贊起三大殿曰開皇安
德五鑾中有歷代帝王御容每月朔望節辰忌日在京文
武百官並赴致祭又於內城東南隅建天雄寺奉安烈考
宣簡皇帝遺像是歲太祖崩應天皇后於義節寺斷腕寘
太祖陵即寺建斷腕樓樹碑焉太宗援立晉遣宰相馮道
劉煦等持節具國簿法服至此冊上太宗及應天皇后尊

號太宗詔蕃部並依漢制御開皇殿闢承天門受禮因改
皇都爲上京城高二丈不設敵樓幅員二十七里門東曰
迎春曰鴈兒南曰順陽西曰金鳳曰西鴈兒曰南福其北
謂之皇城高三丈有樓櫓門東曰安東南曰大順西曰乾
德北曰拱辰中有大內內南門曰承天有樓閣東門曰東
華西曰西華此通內出入之所正南街東留守司衙次鹽
鐵司次南門龍寺街南曰臨潢府其側臨潢縣縣西南崇
孝寺承天皇后建寺西長泰縣又西天長觀西南國子監
監北孔子廟廟東節義寺又西北安國寺太宗所建寺東
齊天皇后故宅宅東有元妃宅即法天皇后所建也其南

貝聖尼寺綾錦院內省司麴院膳國省司二倉皆在大內
西南八作司與天雄寺對南城謂之漢城南當橫街各有
樓對峙下列井肆東門之北潞縣又東南興仁縣南門之
東面鵲營面鵲商販留居上京置營居之西南同文驛諸
國信使居之驛西南臨潢驛以待夏國使驛西福先寺寺
西宣化縣西南定霸縣縣西保和縣西門之北易俗縣縣
東遷遼縣

周廣順中胡嶠記曰上京西樓有邑屋市肆交易無錢而
用布有綾錦諸工作宦者翰林伎術教坊角觝儒僧尼道
士中國人并汾幽薊爲多宋大中祥符九年薛映記曰上

京者中京正北八十里至松山館七十里至崇信館九十里至廣寧館五十里至姚家寨館五十里至威寧館三十里度潢水石橋旁有饒州唐於契丹嘗置饒樂今渤海人居之五十里保和館度黑水河七十里宣化館五十里長泰館館西二十里有佛舍民居即祖州又四十里至臨潢府自過崇信館乃契丹舊境其南奚地也入西門門曰金德內有臨潢館子城東門曰順陽北行至景福門又至承天門內有昭德宣政二殿與擅廬皆東向臨潢西北二百餘里號涼淀在饅頭山南避暑之處多豐草掘地丈餘即有堅冰

祖州天成軍上節度本遼右八部世沒里地太祖秋獵多
於此始置西樓後因建城號祖州以高祖昭烈皇帝曾祖
莊敬皇帝祖考簡獻皇帝皇考宣簡皇帝所生之地故名
城高二丈無敵棚幅員九里門東曰望京南曰大夏西曰
液山北曰興國西北隅有內城殿曰兩明奉安祖考御容
曰二儀以白金鑄太祖像曰黑龍曰清秘各有太祖徵時
兵伐器物及服御皮毳之類存之以示後嗣使勿忘本內
南門曰興聖凡三門上有樓閣東西有角樓東爲州解及
諸官解舍綾錦院班院祇候蕃漢渤海三百人供給內府
取索東南橫街四隅有樓對峙下連市肆東長霸縣西咸

寧縣有祖山山有太祖天皇帝廟御靴尚存又有龍門黎谷液山液泉白馬獨石天梯之山水則南沙河西液泉太祖陵鑿山爲殿曰明殿殿南嶺有膳堂以備時祭門曰黑龍東偏有聖蹤殿立碑述太祖遊獵之事殿東有樓立碑以紀太祖創業之功皆在州西五里天顯中太宗建隸弘義宮統縣二城一

長霸縣本龍州長平縣民遷于此戶二千

咸寧縣本長寧縣破遼陽遷其民置戶一千

越王城太祖伯父于越王述魯西伐党項吐渾俾其民放牧於此因建城在州東南二十里戶一千

懷州奉陵軍上節度本唐歸誠州太宗行帳放牧於此天
贊中從太祖破扶餘城下龍泉府俘其人築塞居之會同
中掠燕薊所俘亦置此太宗崩葬西山曰懷陵大同元年
世宗置州以奉焉是年有騎十餘獵于祖州西五十里大
山中見太宗乘白馬獨追白狐射之一發而斃忽不見但
獲狐與矢是日太宗崩于藥城後於其地建廟又於州之
鳳凰門繪太宗馳騎貫狐之像穆宗被害葬懷陵側建鳳
凰殿以奉焉有清涼殿爲行幸避暑之所皆在州西二十
里隸永興宮統縣二

扶餘縣本龍泉府太祖遷渤海扶餘縣降戶於此世宗

置縣戶一千五百

顯理縣本顯理府人太祖伐渤海俘其王大譔譔遷民於此世宗置縣戶一千

慶州玄寧軍上節度本大保山黑河之地巖谷險峻穆宗建城號黑河州每歲來幸射虎障鷹軍國之事多委大臣後遇弒於此以地苦寒統和八年州廢聖宗秋畋愛其奇秀建號慶州遼國五代祖勃突貌異常有武略力敵百人衆推爲王生千勃突山因以名沒葬山下在州二百里慶雲山本黑嶺也聖宗駐蹕愛美曰五萬歲後當罷此興宗遵遺命建永慶陵有望仙殿御容殿置蕃漢守陵三千戶

並隸大內都總管司在州西二十里有黑山赤山太保山
老翁嶺饅頭山興國湖轄失灤黑河景福元年復置更隸
興聖宮統縣三

玄德縣本黑山黑河之地景福元年括落帳人戶從便
居之戶六千

孝安縣

富義縣本義州太宗遷渤海義州民於重熙元年降爲
義豐縣後更名隸弘義宮

泰州德昌軍節度本契丹二十部族放牧之地因黑鼠族
累犯通化州民不能禦遂移東南六百里來建城居之以

近本族黑鼠穴居膚黑吻銳類鼠故以名州隸延慶宮兵
事屬東北統軍司統縣二

樂康縣倚郭

興國縣本山前之民因罪配遞至此興宗置縣戶七百
長春州韶陽軍下節度本鴨子河春獵之地興宗重熙八
年置隸延慶宮兵事隸東北統軍司統縣一

長春縣本混同江地燕薊犯罪者流配於此戶二千

烏州靜安軍刺史本烏丸之地東胡之種也遼北大王撥
刺占爲牧建城後官收隸興聖宮有遼河夜河烏丸川烏
丸山統縣一